

Il mio post si basa su questa poesia piena di amore dedicata da Mara alla sua nonna...

IN RICORDO DE LA NONNA OLGA

Cara Malia,ò pensà de fotografar de la Olga la storia
parchè co' la so' presensa la ne resta ne la memoria.
Mi posso scriver e fotografar solo quel che de ela ò conossù
ma da quel che la me contava anca el resto ò savù.
Nel giugno del novecentosete l'è nata da Angelo e dall'Angelina
e da quel che la disea la s'è godua quando l'era butina:
la compagnava so' papà a sugar a carte a l'ostaria
e così 'na manceta par qualche dolce la se portava via .
La vivea ben co' so' fradei, sorele ,genitori e sio
e de le pignate de so' mama i ghe ne fasea 'n desio.
L'era 'na butela de bela presensa e ghe piasea anca balar
e così dopo aver conossuo el Tilio la l'è fato innamorar!!
La l'è sposà e i gh'è avuo insieme tri bei buteleti
ma el destin à volù che solo d'ù i diventasse grandeti,
e nonostante le malatie ,la guera e le disgrassie del tempo
a cresserli e a sfamarli la riussia che l'era 'n portento:
la gh'avea late par so' fioi e anca par quei più disgrassadi
e el dottor del fassio el ghe disea che i era ben sgonfadi.
Anca soto le bombe la corea in bicicleta a Cadidai
e tochi de' formaio, de buro, de carne la recuperava par so' fioi.
L'era 'na dona energica ,piena de vita e pronta a l'assion ,
anca se con so' fiola a volte l'era 'n generalon,
e la ghe tendea col sciopo parchè la rigasse sempre drito,
e quando la se trovava co'l moroso la ghe rifilava el so' Ugheto.
La gh'avea anca 'na predisposission par la medicina
e la asistea ai parti e l'era sempre pronta a far 'na punturina .
Così in un pomeriggio d'istà la m'è vista nasser anca mi
e l'è restà sempre con so' fiola finchè l'è partorì.
Mi son restà a casa sua finchè de ani ghe n'ò avù tri
e la me fasea sugar e magnar de gusto ogni dì.
Dopo la me portava tuti i ani al mar a Sotomarina
e insieme se faseimo sempre qualche bela magnadina ,
a volte se alsaimo presto par andar fin a la diga a piè
e a la nostra colassion co paneti e prosiuto no' davemo forfè.
La me comprava sempre par la strada i me' gelatini
e co' l'ucineto in spiaggia faeseimo insieme i nostri laoretini.
L'era sempre pronta a tegnerne tuti durante i viaggi dei me' genitori
e coi nostri noni mi, la Luisa e Dino se senteimo dei siori!
Gh'è sempre piasuo far festa in ogni ocasion
e come coga l'è sempre fato 'n figuron:
la n'è insegnà a tuti a far la torta Margherita
che l'è bona da par ela ma anca ben farcita,
e devo dir che i so' canederli i è i meo che ò magnà

e che i so' bogoni co'l poceto me son gustà!
L'è sempre stà 'na dona al'insegna de la generosità
e chi ghe 'navea de bisogno la l'è sempre aiutà
e anca da vecia l'è sempre stà piena de energia
e a feste e pransi l'è sempre partecipà con alegria.
Adesso che no'la gh'è più resta però quel che l'è fato
e che tra done i 'na fameia calcossa se ciapa l'è rinomato:
così da la Olga a la Malia e da ela a la Luisa e a mi
passa sempre qualcosa anca quando la vita l'è finì
e noialtre ghe contemo a le nostre butelete questa storia
parchè la ne restarà sempre impressa ne la memoria .
Ghe contaremo anca quai i è i tri peccati che Dio non perdona
parchè la ne le spiegava par ben nostra nona
opure quali i è le tre robe che dura 'n ora
che anca in ospedal coi dotori la tirava fora.
Gh'è da dir infati che con la sagessa de la so' età
la guardava la vita e la gente ne la so' essenzialità
no' ghe interesava giaculatorie o file de Avemarie
la volea solo che le robe giuste le fosse compie
e in tuti noialtri che gh'avemo avuo la fortuna de conosserla par ben
restarà sempre el segno de quel che l'è fato par tuti i ani che vien.
Così con la festa de la mama festegemo 'sto rapporto de continuità
che lega ogni mama a so' fiola proprio par l'eternità!!

MARA TOMMASI